



**МЕСЯЦА АВГУСТА В 11-Й ДЕНЬ**

**Преставление преподобнаго отца нашего  
Корнилия Александровскаго, чудотворца**

**НА ВЕЛИЦЕЙ ВЕЧЕРНЕ**

**Блажен муж: 1-й антифон.**

**На Господи возвах: стихиры праздника, глас 1.**

**Подобен: Небесных чинов:**

**прп. Корнилию, глас 8.**

**Подобен: О, преславнаго чудесе:**

**О, преславнаго чудесе! / Земли Александровския дивное прозябение, / Корнилий досточудный / Церковью Русскою прославляется днесь. / Торжествуют христоименитии людие, / устрашаюся демонския полки. / О, каковый дар нам даровася, / егоже молитвами, Христе, спаси души наша, // яко Благоутробен.**

**Преподобне отче Корнилие, / ты, от юности Бога возлюбив, / мирскую суету до конца возненавидел еси, / родители твоя и вся, долу влекущая, оставив, / монашеский чин восприял еси / и, в обитель вселився, / добродетельми просиял еси, / темже ты ублажаем, // величающе тебе прославльшаго.**

**Богоносе всеблаженне Корнилие, / егда обеты иночества Господеву воздал еси, / основание крепко к добродетелем / положил еси в души твоей страх Божий / и, всем покаявася, трудился еси, / смирение же и молчание, и кротость с незлобием / по премногу имел еси. / Душу же и ум от страстей**

очистив, / укрепляем благодатию Божественного Духа, / искушений множество победне претерпел еси, / и ныне, предстоя со дерзновением Владыце Христу, / светлых твоих дарований лучами // просвети поющая память твою.

**Богоблаженне Корнилие,** / кто не подивится твоему долготерпению: / многи скорби и гонения / претерпел еси незлобиво, яко агнец кроткий, / от гонителей удалился еси, / в пустыни преподобного Лукиана вселившись, / и того ученьми жития совершенного достигл еси, / с нимже ныне Престолу Владыки всех предстоиши, // со дерзновением моляся о душах наших.

**Д**несь радостно ликуют / людие веси Александровския, / и святая обитель Успенская веселится, / имея в себе мощи Богоносного отца, / иже на месте сем прославися добродетельми своими, / емуже воспоем глаголюще: / радуйся, пастырю наш предивный, / радуйся, монашескаго жития изрядный устроителю. / Темже, о всеблаженне Корнилие, / молися Христу Богу // спасти и помилвати души наша.

**Слава, глас 4-й:**

Велия слава жития твоего, / преподобне Корнилие, / красоту мира сего от млада возненавидев, / Краснейшаго паче сынов человеческих от сердца возлюбив, / ничтоже паче Того предпочел еси, / иноческий образ восприем радостно, / и в земли Александровстей водворився, / собрал еси монашествующих множество. / И ныне, на Небесех со ангелы Пресвятей Троице предстоиши, // моли даровати нам мир и велию милость.

**И ныне, глас 4: Гора, яже иногда мрачна и дымна:  
Вход. Прокимен дне. Чтения преподобническа.**

**На литии, стихиры глас 2:**

**Яко звезда светозарная явился еси, / преподобне Корнилие, / небо церковное украшаяй / и землю Александровскую озаряяй, / иноческому житию пресветлый светильниче / и словесному стаду твоему премудрый наставниче, / темже вопием ти:// молися Милосердому Богу спасти души наша.**

**Яко крин сельный процвел еси / в земли нашей, досточудне, / благодатию Святаго Духа орошаем, / показал еси учеником твоим стези спасительныя, / темже вопием ти:// молися Человеколюбцу Богу спасти души наша.**

**Слава, глас 5 й**

**Отче Богомудре Корнилие, / ты, бо, первее себе предпочистив, / наставник монашествующих явился еси, / плоды достойныя принесл еси, преподобне, / Вседержителю Богу, / равноангельно на земли пожил еси, / многим добродетели образ быв./ И ныне, во свете невечернем водворяяся, / о нас непрестанно моли, // совершающих честную память твою.**

**И ныне, глас тойже: Приидите, взыдем на гору Господню:**

**На стиховне стихиры глас 5:**

**Подобен: Радуйся, Живоносный Кресте:**

**Радуйся, преподобне Корнилие, / благочестия доблий поборниче, / цвете райский, / верных утверждение, / Церкви украшение, / тлю греховную житием своим разоривый, / вся прилоги вражия до**

конца попрал еси, / и возшедый от земных к небесным. / Оружием Крестным / бесов победил еси, / слава иноков, / преподобных яко воистину удобрение, / ходатаю спасения // моли Христа Бога даровати нам велию милость.

**Стих:** Честна пред Господем / смерть преподобных Его.

**Радуйся,** небесный человек, / земли наша шит и ограждение, / иноков похвало и утверждение, / яко древо плодоплодно явился еси. / Радуйся, Благого Бога / рабе благий и верный, / целомудрия образ, / молитвы делателю усердный, // молися Господеву о чтущих тя.

**Стих:** Блажен муж, бояйся Господа, / в заповедех Его восхощет зело.

**Радуйся,** благочестия правило, / преподобне Корнилие, / радуйся, избранниче Христу Богу возлюбленный, / и ангелов единовсельниче, / сонма преподобных причастиче, / источниче умиления./ Радуйся, обителей твоих священное украшение, / темже любовию зовем ти: // моли спастися душам нашим.

#### **Слава, глас 4:**

**Возсия** днесь пресветлая и всепразднственная память твоя, / преблаженне Корнилие, / презищное земли Александровския прозябение, / к Божией Матери изрядный молитвенниче, / пастырскую мудрость смиренномудрием стяжав, / многим был еси учитель, / и наставник иноком предивен, / и угодник Богу велий показался еси. / Сего ради от Господа венец славы приял еси, преподобне, // Емуже помолися, да спасет души наша.

**И ныне, глас тойже: На горе висоце преображся,  
Спас:**

**На благословении хлебов преподобному Корнилию  
тропарь, глас 2:**

**Имже образом желает елень / на источники  
водныя, / сице возжела душа твоя от юности к Бо-  
гу./ Трудом и молитвою житию святых отец по-  
ревновал еси, / Божиим изволением и молитвами  
Пресвятыя Богородицы / земли Александровския  
свотильник показался еси, / и малое стадо Христо-  
вых овец добре упасл еси. / Сопричти и нас Богом  
собранному твоему стаду, / почитающих любовью  
святую память твою, // Корнилие преподобне отче  
наш.**

### **НА УТРЕНИ**

**На Бог Господь: тропарь праздника дважды.  
Слава, преподобнаго. И ныне, праздника.**

**По 1-м стихословии седален, глас 4-й:**

**От юности твоя Бог возлюбил еси, / умилен-  
ным духом Тому поклоняся, Корнилие преподоб-  
не, / в иночестем чине подвизался еси ревностно, /  
гордаго змия смирением препобедив, / сего ради  
усовершился в Божественном разуме. / Моли, отче,  
Единосущную Троицу / во еже спастися нам. (два-  
жды)**

**Слава, и ныне, праздника:**

**По 2-м стихословии седален, глас тойже:**

**Праздник наста преподобнаго Корнилия, / той  
бо усердно последовал еси Христу, / многими труды  
свое житие изьяснив, / бдением же, постом и мо-  
литвами, / аки лестницею на небо возшел еси. / та-**

мо, с лики преподобных водворився,/ молит Единую Троицу/ во еже спастися нам. *(дважды)*

**Слава, и ныне, праздника:**

**По полиелее седален, глас тойже:**

Пастырское разумение восприяв, монашествоующих столпе и стено,/ возрастил еси талант, вверенный тебе, премудре,/ обители твоя дивно устрояя,/ Пресвятаго Духа благодатию благоухая,/ Божественным гласом обвеселил еси чада твоя,/ к Небеси всех добре наставляя,/ Корнилие, отче наш,/ моли грехов разрешение даровати/ празднующим любовь святую память твою.

**Слава, глас тойже:**

Аки солнце возсия днесь пресветлая память твоя,/ юже чтуще, вси сошедшеся, глаголем:/ о, священная главо:/ всеблаженне Корнилие,/ в земном житии Превечному Богу угодил еси,/ иноков удобрение,/ верных утверждение,/ молитвенниче о душах наших.

**И ныне, праздника:**

**Таже степенна, 1-й антифон 4-го гласа. Прокимен, глас 4-й: Честна пред Господом: Евангелие от Матфея, зачало 43.**

**По 50-м псалме стихира, глас 8-й:**

Преподобне отче Корнилие,/ вся, яже на земли привременная/ победно преобидел еси/ и ангельское житие богато восприяв,/ пастырь предивен воистинну явился еси/ и Духа Пресвятаго обитель показася/ к Небеси яко столпе огненный наставляя./ Тамо с лики преподобных нетленных благ причастился еси./ Молися о чадах твоих / Христу

Богу нашему,/ ты бо достойно ублажаем, /просяще тобою прияти мир/ и спасение душам нашим.

**Канон праздника первый, глас 4-й, на 6. Таже канон преподобнаго на 8, глас 8-й, егоже краеграние без Богородичнов: Корнилию блаженному молюся.**

### **Песнь 1-я**

**Ирмос:** *Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.*

**Корнилие блаженне,/ моря житейскаго треволение не погрузи корабля твоего душевнаго,/ веянием бо Духа Божия управляем,/ в тихое пристанище вшел еси,/ и многими благодатными дарами прославился еси.**

**О** всех Христа моли, преподобне Корнилие,/ память твою любовью почитающих,/ избавитися вечнаго мучения, да тебе вси, яко тепла предстателя, песнями величаем/ и твоим мощем верою поклоняемся.

**Разум совершен показал еси, святе,/ от юности Единого Бога возлюбив,/ вся же житейская преобидев,/ монашеское житие изволил еси,/ темже был еси преподобным единокитеlem и праведным.**

**Богородичен:** *Страсти плоти мояя,/ и ума моего движания утоли,/ молю тя, Пречистая Дево,/ и исправи мя, заблудшаго умом.*

### **Песнь 3-я**

**Ирмос:** *Ты еси утверждение притекающих к Тебе, Господи,/ Ты еси свет омраченных,/ и поет Тя дух мой.*

**Непобедим** пребыл еси, преподобне, о Господе,/ препоясавшем тя силою Своею,/ еюже гордость демонов низложися,/ молися победы на супостаты даровати православным христианом.

**Имея** поспешествующую тебе Божию силу, премудре,/ кротостию и смирением последовал еси Владыце Христу,/ всем вся воистинну был еси,/ богатых же и убогих неослабно благочестию поучая,/ и возсиял еси в земли Александровстей, яко солнце,/ темже моли спастися нам.

**Люди** вся, тебе ведущия,/ и заступления твоего чающия, не презри, отче,/ молися Христу Богу даровати всем полезная,/ да чистым сердцем Ему возопиим:/ молитвами преподобнаго Твоего спаси нас, Господи.

**Богородичен: В** ложесна Твоя воплощаем, Всенепорочная,/ вселься Зиждитель,/ на благодеяние верно поющим Тя.

**Кондак, икос праздника.**

**Седален преподобнаго, глас 4-й:**

**Страстное** покорил еси плотское мудрование,/ Богомудре Корнилие,/ преславне сокрушил еси бесовския козни постом/ и возсиял еси в мире яко луча солнечна добродетельми,/ молитву сотвори Святей Троице/ грехов оставление даровати/ верою и любовию чтущим тя.

**Слава, глас тойже:**

**Днесь** исполняется радости обитель Успенская,/ честныя и многоценныя мощи твоя содержащи/ и боголюбивое твое житие прославляющи,/ днесь христианстии людие ревностию спасения

просвещаются,/ днесь греховныя отгоняются страсти,/ и помыслы покаяния души наша объемлют,/ и яко отцу чадолюбиву вопием ти:/ молися Христу Богу, преблаженне Корнилие,/ еже спасти и просветити души наша.

**И ныне, праздника:**

**Песнь 4-я**

**Ирмос:** *Услышах, Господи,/ смотрения Твоего таинство,/ разумех дела Твоя/ и прославих Твое Божество.*

**Избави** обители твоя, преподобне,/ от всякаго навета вражия/ и исполни я любви и благодати,/ еже не помышляти о житейских,/ но неувядаемая достигнути славы и доброты,/ молитвами твоими, молимся.

**Юноша** телом, но старец умом,/ в начале монашескаго жития твоего был еси, отче,/ кто от человек не подивится долготерпению твоему,/ искушения бо и напасти благодарне претерпевал еси,/ Триединое прославляя Божество.

**Буди** о нас молебник и ходатай ко Пресвятей Троице,/ и подвигни на молитву с тобою лики святых,/ ихже житию поревновал еси, преподобне,/ с нимиже купно молися о мире и устройении всего мира./ Безстрастием, верою и любовию украси всех,/ преславную память твою чтущих.

**Богородичен:** *Нива* духовная,/ якоже из бразды клас изнесла еси, всю тварь питающаго,/ всяческих Бога, Приснодево.

### **Песнь 5-я**

**Ирмос:** *Утренююще вопием Ти,/ Господи, спаси ны,/ Ты во еси Бог наш,/ разве Тебе иного не ве-мы.*

**Льва** рыкающа и ищуща поглотити души спасаемых/ молитвою твоею победил еси, отче,/ притекающих к тебе евангельскому житию научая,/ приложил еси труды ко трудом,/ сего ради небесная благая приложишася тебе.

**Ангеле** земный и небесный человече,/ **Корнилие** преподобне,/ Господа Бога освятил еси в души твоей,/ рачитель быв небеснаго Царствия,/ явился еси верный делатель заповедей Христовых,/ чадом же твоим учитель и упование.

**Житием** чистым последовав Владыце Христу/ во смирении и терпении мнозе, блаженне,/ плоть свою изнуря постами, трудами и бдением,/ темже ныне с лики святых пребываеши на небеси/ и зриши доброту неизреченную Христа Бога нашего.

**Богородичен:** *Исцели недугующаго ума моего омрачение,/ врача рождающая Христа,/ Всенепорочная Владычице.*

### **Песнь 6-я**

**Ирмос:** *Молитву пролию ко Господу/ и Тому взвешу печали моя,/ яко зол душа моя исполнися,/ и живот мой аду приближися,/ и молюся, яко Иоанна:/ от тли, Боже, возведи мя.*

**Единаго** Бога в сердце своем имея, блаженне **Корнилие**,/ в земли Александровстей апостольски пожил еси,/ темже усердно молим тя:/ заступи твою землю, угодниче Божий,/ да не погибнем в бездне греховней.

**Н**аших скверн не возгнушайся, Корнилие преподобне,/ но твоими молитвами сия очисти,/ всем бо воистинну предстатель и помощник предивный,/ Христу покаянныя приносящим слезы.

**Н**изложил еси державу и силу вражю крепостию духа,/ и похвалы победныя почести приял еси,/ яко воистинну был еси столп непоколебим благочестия/ и подвижник совершенный о Христе,/ в немже тля греховная никакоже обрѣтется.

**Богородичен:** Господь с Тобою Пречистая,/ якоже изволил есть, быв Отроковице,/ всех нас от области льстиваго ходатайством Твоим избавил есть:/ темже Тя ныне по долгу родове родов ублажаем.

#### **Кондак прп. Корнилию, глас 4:**

Заповеди Христовы усердно исполнив, / пастырства благодать наследовал еси, / болезнью сердцем о всех, верою притекающих к тебе, / иноков собиратель, Корнилие преподобне. / Темже и мы, чада твоя, с любовью вопием ти: / со учителем твоим преподобным Лукианом // моли Христа Бога спастися душам нашим.

#### **Икос:**

**С**ущая в мире преобидев,/ монашескому житию поревновал еси,/ и на страсти аки безплотен подвизався,/ ангельскими нравы себе благоукрасил еси, Корнилие блаженне,/ сего ради духовная разумения прим, был еси по преподобном Лукиане во обителех его монахов начальник./ Темже сошедшеся, день твоего преставления духовно празднуем, / подвиги твоя почитающе и похвальная воспевающе: / радуйся, яко от юности твоя

избран сосуд Пресвятому Духу бывый;/ радуйся, обители твоя во славу Божию распространивый./ Радуйся, яко мирскую славу и красоту во уметы вменил еси;/ радуйся, яко собранных тобою чад Господеви привел еси./ Радуйся, немощи немощных евангельски носивый;/ радуйся, к Богородице молитвенниче наш неусыпный./ Радуйся, иноком премудрый учитель и утешение;/ радуйся, земли Александровския похвало и утверждение./ Отче Корнилие, моли Христа Бога спастися душам нашим.

### **Песнь 7-я**

**Ирмос:** *От Иудеи дошедше отроцы,/ в Вавилоне иногда,/ верою Тройческою пламень пещный попраша, поюще:/ отцев Боже, благословен еси.*

**Обитель** Флорищева юностию твоею красуется, славне Корнилие,/ и Лукианова пустынь мужеския подвиги твоя благовествует,/ Успенская же обитель старостию твоею хвалится / и блаженною кончиною веселится,/ яко весь Христу приблизился еси яснейши, поющи:/ отцев Боже, благословен еси.

**Мудрости** божественный любитель/ и евангельских заповедей проповедник,/ щедр был еси нищим, сирым и странным,/ кающимся же милостив и научения требующим учитель кроток,/ много слез о них проливая, зовущи:/ отцев Боже, благословен еси.

**Узким** и тесным путем шествовал еси, преподобне,/ восхожденьми Божественными сердца твоего,/ аможе молитвы богомудраго отца твоего Лукиана наставиша тя, / вся прилоги диаволи

смирением и незлобием низложил еси, присно зовый:/ отцев Боже, благословен еси.

**Богородичен:** Ново отроча рождши Пребезначальнаго Слова,/ обетшавшыя ны грехом обновила еси, Дево,/ и пети укрепила еси:/ отцев Боже, благословен еси.

### **Песнь 8-я**

**ирмос:** *Богоглаголивии отроцы в пещи,/ со огнем пламень попирающе, пояху:/ благословите, дела Господня, Господа.*

**Миру** умертвися и плотския страсти укротив,/ будущую жизнь наследил еси, всеблаженне Корнилие,/ темже верным людем, творящим святую память твою,/ испроси грехов прощение, вопиющим:/ благословите, дела Господня, Господа.

**Огнем** Божественныя любви распяем, преподобне,/ всякое злострадание до конца претерпел еси,/ посрамив благодатию божиею и молитвами Владычицы вселукаваго врага,/ Бога же в Троице славимаго прославил еси, песнослова:/ благословите, дела Господня, Господа.

**Ликам** святых сопричтен еси, богомудре Корнилие,/ понеже угодил еси Богу добродетельным житием,/ с небесными воинствы ныне Троице предстоя,/ моли спастися всем православно ты почитающим/ и дивному во святых своих Богу взывающим:/ благословите, дела Господня, Господа.

**Богородичен:** Вода еси неисчерпаемая, Дево,/от Неяже вси пиюще, благодати исполняемся,/ душою и телом освящаеми.

## Песнь 9-я

**Ирмос:** Устрашися всяк слух / неизреченна Божия снизхождения,/ яко Вышний волею сниде даже и до плоти,/ от девического чрева быв Человек:/ темже Пречистую Богородицу вернии величаем.

**Ю**ношескую бодрость в трудех и подвигах являя, блаженне отче,/ аще и состарелся еси,/ обаче злобою младенствовал еси, пример смиренномудрия всем подавая,/ темже восхваляем тя, добрыми дела прославльшася.

**С**мирению Христову подражаше, преподобне,/егда начальство, яко служение всем, прият,/ в тяжких службах подвизашеся,/ братии же бяше образ кротости и трудолюбия правило,/ и о молитве присное напоминание, Корнилие досточудне.

**Я**коже изливаеши благодать твою, Христе, Спасе наш на святых Твоя,/ тем и нам даруй милости твоя, почитающим преподобнаго твоего,/ егоже молитвами Церковь и страну нашу миром огради/ и спаси души наша.

**Богородичен:** Просвети, Чистая Дево,/ сетующее сердце мое присно преступленьми,/ и житейскими многими молвами;/ не остави мене врагом быти в радость, / яко да славлю Тя и любовьию пою, Препетая.

## Светилен:

**П**росвети, преподобне, наша сердечныя очи/ памятью достохвальнаго твоего жития./ равноангелен показася, Корнилие Богоносе,/ темже радуемся о Господе и величаем озарившаго тя,/ светоносче блаженне, преподобных похвало. *(дважды)*

**Слава: и ныне, праздника:**

**На хвалитех поставим стихов 6 и поем стихиры  
праздника 3, глас 2-й:**

**И преподобному Корнилию, глас тойже:**

**Егда Божие рачение найде на тя,/ преблаженне  
отче Корнилие,/ тогда вся сущая в мире оставил  
еси./ Крест Христов на рамо взем,/ праведне бого-  
шествовати учил еси/ и дошел еси Царствия Не-  
беснаго,/ в немже ныне с преподобными ликовст-  
вуя,/ моли спасение получитьи нам // и велию ми-  
лость.**

**Преподобне отче Корнилие,/ ты возшед на  
высоту добродетелей, / маслина воистину Божия  
плодовита явился еси, / образ трудолюбия всем  
показавый, / нестяжания учителю, / любви источ-  
нике неизсякаемый, / сирых и странных утешение,  
/ стадо твое добре соблюдый // в преподобии и  
правде.**

**Днесь благовернии Владимирстии собори,/ в  
память отца нашего соберитесь,/ обстояще чест-  
ныя его и многоценныя мощи/ и святой его образ  
любезно целующе,/ всех бо, чтущих его, благослов-  
ляет,/ и возводя к трудом и подвигом, тайно глаго-  
лет:/ возлюбите Господа, да обрящете благодать  
вечную,/ еяже и мы сподобимся твоими молитва-  
ми,/ Корнилие всехвальне.**

**Слава, глас 4-й:**

**Торжествует Российская / всесвященная Цер-  
ковь Божия,/ прославляя ныне Корнилиа препо-  
добнаго,/ приидите, иночестии собори / и право-  
славнии людие,/ утвердил бо Господь милость  
свою на боящихся его,/ и призре на молитву за-**

ступника нашего,/ собрав под криле его чада, прежде расточенная,/ врата обителей черноризцам отверзающе./ утверди нас молитвами твоими, отче прехвальне,/ радостною душею твое преставление празднующих,/ прославляющих Спаса нашего, тебе прославльшаго, // Дивнаго во святых Своих Бога нашего.

**И ныне, праздника, глас 8-й:**

**Поют Христос Петра, Иакова и Иоанна:**

**Славословие великое. И отпуст.**

**НА ЛИТУРГИИ**

**Блаженны праздника и святаго. Прокимен праздника и святаго, глас 7-й: Честна пред Господом: Апостол к Галатам, зачало 213. Аллилуиа, глас 6-й: Блажен муж, бойся Господа: Причастен праздника и святаго: В память вечную:**

**МОЛИТВА**

**О, священная главо, преподобне и богосне отче наш Корнилие! Ты, всеусердно поработати Господеву желая, в земли Александровстей вселился еси, обители основанныя богомудрым Лукианом добре устроая. Неленостно в трудех, бдениих, молитвах и постех подвизаяся, бесовския козни мужески поправше, был еси наставник монахом, всем же людем учитель ревностный и отец чадолюбивый. Ныне убо, по отшествии твоем от земных Небесному Царю предстоя, моли благодать Его, еже ущедрити место селения твоего и святые обители твоя, идеже духом любви твоея неотступно пребывавши; и всем людем, с верою к мощем твоим приходящим, во благая прошения их исполнити. Испроси у Великодаровитаго Бога нашего, да**

сохранит Святую Церковь непозыблему от ересей и расколов, Отечеству нашему мир и тишину да дарует, нам же да продлит время на покаяние и исправление жития. Утверди нас в соблюдении Христовых заповедей, да тако zde богоугодно поживши, сподобимся безпреткновенно внити в вечное Небесное Царство, идеже ты со преподобным Лукианом и всеми святыми непрестанно прославляеши Отца и Сына и Святаго Духа во веки веков. **Аминь.**